

आकाशवाणी जयपुर-अजमेर
प्रादेशिक समाचार

दिनांक 18.05.2025

समय: 18.45 बजे

- प्रधानमंत्री नरेन्द्र मोदी आवती 22 मई ने बीकानेर ऊं देश रा 103 ठोड़ां माथे रेल्वे ठेसनां रा सुदृढीकरण कामां रो वर्चुअल लोकार्पण करेला-इण मांय प्रदेश रा चार ठेशन भेळा।
- ऑपरेशन सिंदूर री कामयाबी माथे प्रदेशभर मांय उमाव रो माहौल-न्यारी-न्यारी ठोड़ां सैनिकां रा सनमान मांय तिरंगा यात्रावां रो आयोजन।
- प्रदेश ऊं सांसद मदन राठौड़ अर पी.पी. चौधरी ने संसद रत्न पुरस्कार 2025 सारू चुणी ज्या।
- राज्य मांय न्यारी-न्यारी ठोड़ां करड़ी गर्मी अर लू रो असर बण्योडो है।

000

प्रधानमंत्री नरेन्द्र मोदी आवती 22 मई ने बीकानेर जिला रा दौरा माथे आवेला। बीकानेर मांय तैय कार्यक्रम रे दौरान श्री मोदी देश रा 103 ठोड़ां माथे रेल ठेसनां रा सुदृढीकरण रा कामा रो लोकार्पण करेला। इण मांय प्रदेश रा देशनोक, बूंदी, मांडलगढ़ अर गोगामेड़ी ठेशन भेळा है। आं ठेसनां मांय जातरियां सारू चोखो इन्तजार सारू एरियो, हाईटेक टिकट काउंटर, कैफेटेरिया, एस्केलेटर, लिफ्ट, डिजिटल डिस्प्ले बोर्ड, साफ-सुथरा टॉयलेट्स, चोखी रोशनी अर हिफाजत बन्दोवस्त सुविधावां दी जाएला। इण रो डिजाइन स्थानीय कला, इतिहास अर संस्कृति ने ध्यान मांय राखता तियार करी ज्यो है। प्रधानमंत्री रो नाल हवाई अड्डा माथे जवानां ऊं बतळ करण रो ई कांक्रम है। केंद्रीय मंत्री अर्जुनराम मेघवाल अर मुख्यमंत्री भजनलाल शर्मा प्रधानमंत्री रा दौरा ने देखता अठे तैयारियां रो जायजो ले चुक्या है।

000

ऑपरेशन सिंदूर री कामयाबी माथे प्रदेशभर मांय उमाव रो माहौल है। न्यारी-न्यारी ठोड़ां सैनिकां रा सनमान मांय तिरंगा यात्रावां निकाळी जाय री है। इण मांय घणी तादाद मांय लोग हिस्सो ले रिया है। ई कडी मांय पाली, जालौर अर जैसलमेर मांय आज तिरंगा यात्रा निकाळी ज्यी। सामाजिक न्याय अर अधिकारिता मंत्री अविनाश गहलोत अर पशुपालन अर डेयरी राज्यमंत्री जोराराम कुमावत, पाली मांय तिरंगा यात्रा मांय भेळा व्ह्या। ई मौके केबिनेट मंत्री अविनाश गहलोत कह्यो के सेना रा शौर्य माथे देशभर मांय मान जतायो जा रियो है।

.....

उठी ने अजमेर मांय आज तिरंगा यात्रा निकाळी ज्यी। ई जातरा मांय विधानसभा अध्यक्ष वासुदेव देवनानी, केन्द्रीय किसान कल्याण राज्यमंत्री भागीरथ चौधरी अर जल संसाधन मंत्री सुरेश सिंह रावत समेत कई जन नुमाइंदा अर लोग भेळा व्हिया। भरतपुर मांय काले तिरंगा रैली निकाळी जाएला। आ रैली शहर रा खास मार्गा ऊं व्हेता लक्ष्मण मंदिर चौक ताई पूगेला। सवाईमाधोपुर मांय 21 मई ने निकाळी जावण वाळी जातरा ने लेर आज तैयारी बैठक व्ही।

000

संसदीय कार्य मंत्री किरन रिजिजू कह्यो है के सात सर्वदलीय नुमाइंदा मण्डल बेगा ई खास देशां रे साथे बतळ करेला। वणा कयो के ऑपरेशन सिंदूर रे तैत आतंकवाद रे खिलाफ भारत रा भेळा संकल्प ने दरसावे है। एक सोशल मीडिया पोस्ट मांय श्री रिजिजू ई भेळा मोर्चा री नुमाइंदगी करण वाळां सांसदां अर प्रतिनिधिमंडलां री सूची साझा करी। उनसठ सांसदां वाळा सात समूह 32 देशां रो दौरा करेला। हर नुमाइंदा मण्डल मांय एक सेवानिवृत्त राजनयिक ई भेळा व्हेला।

000

मुख्यमंत्री भजन लाल शर्मा आज जयपुर मांय आपरा रेहवास माथे महाधिवक्ता अर अतिरिक्त महाधिवक्तावां रे साथे महताऊ कानूनी प्रकरणां ने ले र समीक्षा मीटिंग करी। वणा ई दौरान विधिक मामलां मांय संवेदनशीलता, साफगोई अर न्यायसंगत कार्यवाही समेत न्यारा न्यारा मुद्दां माथे बतळ करी।

0000

श्रीगंगानगर मांय राजस्थान रो पहलो स्काउट गाइड एडवेंचर पार्क बणायो जावेला। आज जिला मुख्यालय माथे व्हा जळसा मांय बोलता शिक्षा मंत्री मदन दिलावर ई बारा मांय ऐलाण कर्यो। वणा जिला मुख्यालय माथे विधायक कोटा ऊं बण्या स्काउट गाईड हॉल री नींव धरी। वठे ई राजकीय उच्च प्राथमिक स्कूल नम्बर 11 मांय सवा दो करोड़ रिया री लागत ऊं बण्या नुवा भवन रो लोकार्पण कर्यो। शिक्षा मंत्री मौजूद जनसमूह ने पॉलीथिन काम मांय नी लेवण रो संकल्प दिरायो। इण रे अलावा वणा लोगां ऊं बत्ती ऊं बत्ती पौधा लगावण री अरज करी।

000

प्रदेश भाजपा अध्यक्ष अर राज्यसभा सांसद मदन राठौड़ अर पाली सांसद पी.पी. चौधरी समेत 17 सांसदां ने संसद रत्न पुरस्कार 2025 सारू चुण्णी ज्या है। वणा जनहित रा मुद्दां ने असरदार ढंग ऊं उठाया, नीतिगत चर्चावां मांय भागीदारी अर विधायी कामां मांय सक्रिय भूमिका निभाई है। राष्ट्रीय पिछड़ा वर्ग आयोग रा अध्यक्ष हंसराज अहीर री सदरत वाळी निर्णायक समिति इण रो चयन करयो है। दो संसदीय स्थाई समितियां ने ई ई ओ ईनाम दियो जाएला। रोकड़ अर खेती दो स्थायी समितियां ने ई संसद मांय प्रस्तुत वां री रपटां रा आधार माथे चुण्णी ज्या है।

000

अलवर जिला रा सरिस्का बाघ अभ्यारण्य मांय सैलाणियां सारू नुवा सफारी रूट विकसित कर्या जाएला। अ रूट बाघां ने बचावण अर पर्यटन ने बधावो देवण रा मकसद ऊं टाइगर कंजर्वेशन प्लान रे तैत विकसित व्हेला।

000

प्रदेश मांय लारला चौबीस घंटा मांय न्यारा-न्यारा हादसां मांय ग्यारह लोगां री मौत व्हे ग्यी। डूंगरपुर जिला मांय जीप अर ट्रक री टक्कर मांय जीप मांय सवार चार लोगां री मौत व्हे ग्यी। ई हादसा मांय आठ लोग घायल व्हे ग्या। हादसा रा शिकार लोग एक ब्याह रा कार्यक्रम ऊं आय रिया हा। वठे ई चूरू जिला रासरदारशहर कस्बा मांय एक महिला अर उण रा तीन टाबरां री डूब जावण ऊं मौत व्हे ग्यी। बंधनाऊ दिखनादा गांव मांय तळाब ऊं वां रा शव बरामद करी ज्या। वठे ई सवाईमाधोपुर जिला मांय एक हादसा मांय मां-बेटी समेत एक ई पिरवार रा तीन लोगां री मौत व्हे ग्यी। ओ हादसो खंडार हलका मांय काले जूना सेफ्टी टैंक री पट्टियां पड़ जावण ऊं व्हीयो, जिण रा मळबा मांय दब जावण ऊं तीन्यू दम तोड़ दियो। मुख्यमंत्री भजन लाल शर्मा डूंगरपुर सड़क हादसा मांय मरण वाळा रा पिरवारजनां रे प्रति शोक जतायो है। वणा जिला प्रशासन रा अहलकारां ने घायलां रो वाजिब ईलाज करावण रा निर्देश दिया है।

000

आज अंतर्राष्ट्रीय संग्रहालय दिवस है। ई मौके देश मांय पुरातत्व सर्वेक्षण महकमा रा संरक्षण वाळा सगळा स्मारकां अर संग्रहालयां मांय मुफ्त प्रवेश दीरी ज्यो। ई दिन रो आयोजन सांस्कृतिक विरासत ने बचाया राखण सारू कर्यो जावे है। साथे ई शिक्षा अर संवाद ने बधावो देवण मांय संग्रहालयां री भूमिका कानी ध्यान दिरावणो ई ई दिन रो मकसद है। प्रदेश मांय ई ई मौके न्यारा-न्यारा कार्यक्रम व्हे रिया है। जोधपुर रा राजकीय संग्रहालय मांय छाया चित्र नुमाइश लगायी ज्यी। अलवर मांय सिटी पैलेस रा संग्रहालय मांय ई आज मुफ्त प्रवेश दीरी ज्यो।

000

प्रदेश मांय न्यारी-न्यारी ठोड़ां करड़ी गर्मी अर लू रो असर बण्योडो है। दिन रे साथे ई रात मांय ई करड़ी गर्मी ऊं आराम नी मिल रियो है। लारला 24 घंटां मांय चार शहरां रो तापमान 45 डिग्री रे सारे पूग ग्यो। सब ऊं बत्ती 46 डिग्री सैल्सियस बत्ती रो तापमान श्रीगंगानगर मांय दर्ज व्हीयो। पिलाणी, फलौदी अर चूरू समेत केई ठोड़ां हीटवेव रा हालात रिया। 31 दशमलव 8 डिग्री सैल्सियस रे साथे बीकानेर री रात सब ऊं बत्ती गर्म री। हनुमानगढ़, सवाईमाधोपुर अर सलूम्बर मांय दिन मांय बजारां मांय सन्नाटो पसर्यो रियो। भीलवाडा मांय बादळ छायी ज्या रेहवण रे बावदूज गर्मी रो असर बण्योडो है। वठे ई बालोतरा मांय ई तेज गर्मी रे कारण सड़कां सूनी री।

.....

मौसम महकमो आवता तीन-चार दिनां मांय तापमान मांय बढ़वार अर हीटवेव रा हालात री आस जतायी है। मौसम विज्ञान केंद्र जयपुर मुजब आवता चार-पांच दिन बीकानेर, जोधपुर संभाग अर शेखावाटी रा कुछ हलकां मांय हीटवेव रो दौर चालता रेहवण री आस है। उदयपुर, कोटा अर भरतपुर संभाग मांय काले ऊं आवता चार-पांच दिन कठे-ई-कठे हल्की बिरखा अर आंधी चालण री आस है।

000

जयपुर रा विश्वकर्मा औद्योगिक हलका मांय रोड़ नंबर-17 माथे आज संवारा प्लास्टिक रा कबाड़ गोदाम मांय आग लाग ग्यी। जाणकारी मिलण माथे मौके माथे पूगी पांच दमकलां करड़ी कोशिश रे पछे आग माथे काबू कर्यो। सहायक अग्निशमन अहलकार भंवर सिंह हाड़ा बतायो के हादसा मांय कोई जनहानि नी व्ही है।

000

आईपीएल क्रिकेट होड मांय आज जयपुर मांय राजस्थान रॉयल्स अर पंजाब किंग्स रे बीचे मुकाबलो चाले। सवाईमानसिंह स्टेडियम मांय खेल्या जा रिया ई मुकाबला मांय पंजाब किंग्स री टीम टॉस जीतने पेहला बल्लेबाजी करण रो फैसलो लियो अर राजस्थान रॉयल्स ने जीत सारु 220 रन रो लगस दियो। ताजा समाचार मिलण तांई लगस रो पाछो करता राजस्थान रॉयल्स री टीम 18 ओवर मांय 181 रन बणा लिया है अर उण रा 5 खिलाड़ी आउट व्हीया है।

000

प्रधानमंत्री नरेन्द्र मोदी 25 मई दीतवार ने आकाशवाणी ऊं प्रसारित कर्या जावण वाळा खास कार्यक्रम **मन की बात** मांय विचार बतावेला। आ हर महीना प्रसारित कर्या जावण वाळा ई कार्यक्रम री 121वीं कड़ी व्हेला। ई सारु आप ई 23 मई तांई सुझाव भेज सको हो। आप मुफ्त नम्बर 1800-11-7800 या नरेंद्र मोदी एप या माय जीओवी ओपन फोरम रे जरिए सुझाव भेज सको हो। ओ कार्यक्रम आकाशवाणी अर दूरदर्शन रा पूरा नेटवर्क, आकाशवाणी समाचार री वेबसाइट, न्यूज ऑन एआईआर मोबाइल एप, आकाशवाणी समाचार, दूरदर्शन समाचार, प्रधानमंत्री रा दफतर अर सूचना अर प्रसारण मंत्रालय रा यू-ट्यूब चैनलां माथे ई उपलब्ध रेहवेला।

000